


二希堂緝齋文詩合編

崇堃題簽

PL
2757
S14
1785
V.4



緝齋文集卷之六

漳浦蔡新葛山

記

平和安厚書院記

漳爲朱子教化之區郡邑多有專祠及遠鄉陬澨鄉士夫之振興文教者往往卽其地爲祠宇築學舍俾諸生以時講肄其中行舍菜焉蓋六百年於茲矣平和爲縣在萬山之中界連數郡有明中葉爲盜賊盤踞之藪禮教之所不興自正德間王文成公合兩省之兵掃蕩

賊巢始立縣治設學校興教化久而彌光和人不忘其德至於今俎豆之猶闡郡之思朱子也乾隆戊寅進士何君象宜以其鄉去邑治遠士之業詩書遊庠序者日益衆慨然思創建書院以崇先賢而惠後學乃相山川之宜卜吉菴後湯堦偕同志舉人賴君升文倡義勸輸四鄉紳士聞風嚮應未逾年而費集召匠鳩工飭材庀具無有不良前後爲三堂旁列學舍二十餘間門廡齋房井竈庖廐具備繚以長垣周可千尺雜植花木花卉草石空其地以建文昌閣擴講堂焉規櫺旣新宮墻聿

煥以今年正月望日崇祀朱子於中櫺而以後堂並祀
王文成公入祠之日冠裳畢會濟濟雍雍咸歡欣鼓舞
移書請余記之余惟書院之祀先賢所以正學者之趨
使之知所依歸也朱子之學如布帛菽粟士子童而習
之老死而不能易固非後學所能讚頌者獨陽明之學
論者謂其與朱子牴牾二百年來以爲口實若貿貿焉
隨聲附和而不爲之抉其旨趣則今日之舉不幾舛乎夫
聖人之道一而已矣學者之高明沉潛不能盡同而教
者之覺世牖民亦各有攸當也朱子當釋老盛行之時

士皆高談性命漸入於杳冥恍惚之途故引之於切近
精實之中使之由博以返約循序而致精是聖學之階
梯也陽明當詞章汨沒之時士皆博雜以爲高剽襲以
爲富一切苟且以就功名不知身心性命爲何物於是
直指本體發爲良知之論使之因端竟委亦救時之藥
石也而究其指歸同以聖人爲可學同以省克爲實功
同以遏欲存理戒謹恐懼爲入門同以君臣父子夫婦
昆弟朋友爲實境亦安在其與朱子戾耶獨其末流之
邁議論駿發一時輕俊之徒樂其簡易遂

猖狂自恣此則龍谿諸人傳之者之過也夫龍谿之於
陽明猶慈湖之於象山也象山六經註我之言亦謂聖
賢明道無非先得我心之同然慈湖則詆毀聖賢棄捐
經典矣陽明無善無惡之旨亦謂心之本體不着一物
龍谿天泉証悟則並舉意知物而亦空之矣余悲夫今
世學者本無學爲聖賢之志又不察夫立教者之用心
而但掇拾糟粕剿說雷同以肆其詆誣之口將游夏閔
冉之殊科等之孔墨孟告之異室甚矣其爲膚末之見
也況陽明之文章氣節經濟事功磊磊明明尤衆所共

見者昔朱子讀李忠定文集謂使公之策見用於靖康
建炎之際必不至貽吾君今日之憂誠使陽明生南渡
之時出其擒濠平峽之才以安邦敵愾其於伯紀何如
也吾知朱子亦必將太息泣下慨慕而不能舍置然則
今日之同俎豆而共升香也禮亦宜之若夫講習服行
之方師弟子之所以教且學者則有朱子白鹿洞之遺
規在百世行之而無弊者也余何言焉是役也山城會
姓實始輸地立基諸生某某共董厥工而斥數百金以
倡率集事者則貢生何興烈江漢清之力旣成一等海

澄公立齋黃公復買田若干畝以供春秋祭祀皆盛誼
也例得並書時乾隆二十三年四月之朔

以四畝並書却並到二十三辛四良之陳

公立齊黃公賈買田若干兩以共春秋祭祭厥習想節

重修漳州府督學使院考棚記

國家立賢無方登進之途至廣而以出自科目者爲可貴科目之途必自博士弟子始故院試者士子進身之權輿也當其校藝之日魚貫而入蟻附以居坐不得橫肱行不得旋踵駢肩聚首次且顛跪困抑而不得舒也鄉貢禮闈之試抑又甚焉蓋待之也貴則其試之也必嚴得之也榮則其取之也匪易歷數百年于斯矣吾漳督學使院舊爲雜造局地國朝建爲公署康熙間復修瓦廠爲試場而規模湫隘右界元妙觀後左俱連民

舍前臨衢道試士坐號僅盈千每試期窄不能容則通
元妙觀爲蓬廠以充之兩痕滲漉日光穿漏墊鬱炎溽
之氣與人氣相薄射多士苦之乾隆二十二年季秋棚
忽壞龍溪邑令陶君偕六邑同僚共任興復七屬諸紳
士咸聞風踴躍捐輸恐後又以限于地不克拓前規乃
卽署後及西偏之舊屬官地而久溷民居者予其值以
歸于公於是規模式廓移前堂爲試廠增坐號至二千
三百有奇爲堂者三廊廡房舍庖湍井灶之所廓如秩
如下逮僕役騶從咸有位置經始于戊寅六月旣望迄

己卯正月凡八閱月而竣事縻白金五千八百餘兩于
時閩郡紳士相與揭榜於堂大書澤溥菁莪以垂示來
茲而移書屬予記之余惟試院之修廢非僅爲士子之
課藝計也其事與學校相表裏而政治之得失人才之
盛衰亦恒于是乎驗之詩菁莪之序曰樂南材也而其
卒章則曰汎汎楊舟哉沉載浮者何也蓋人材之在天
下猶舟之在大水也以楊爲舟非無濟川之具然而或
沉或浮漂搖于洪濤巨浪之中棄置于斷港絕潢之內
而莫知所止者無柁師以操其柄也學者之心思才力

皆足以有爲而又濟之以博聞強記乘時得駕其爲舟楫幹濟之具不難也然而志道德者或入於迂疎談經術者或溺于文詞侈事功者或流于富貴利達一切得失毀譽升沉禍福榮悴悲愉之念搖惑于中汨沒而不能自振其視汎汎浮沉之舟殆有甚焉故又繼之曰旣見君子我心則休言必有君子之長養教育以風于上猶操舟者握其柁而示之指南然後天下之學術一心志定而人才茂美也今國家文教誕敷絃誦之徒徧于陬澨

聖天子加意振興督學一官尤重其選膺是職者類皆
精白乃心以主持風化爲已任一時守土之官又能留
心文事修廢舉隆以風示草野樂育之休可謂倡之自
上矣異日就試于斯者必能本其所學以發爲文章上
應國家昌明之運慰當事者鼓舞作興之心以爲科
目光又豈僅貿貿焉從俗浮沉與時俯仰譬彼舟流莫
知所屆哉余因記其事而備言之以終菁莪卒章之義
於時觀察使南皮張公某郡太守會稽余公某皆以名
進士來蒞此邦成茲盛舉而龍溪邑侯某公某則率先

七邑以成之者也董其役者進士鄭君某舉人某貢生

某生監某等皆分任其責例得並書

重修漳浦懷德書院碑記

漳浦北關內有懷德書院者自順治之十有三年祀故
昭武將軍提督楊公者也當是時鄭逆猖獗海氛方熾
公來鎮茲土修城郭禦寇敵綏衆靖民厥功甚鉅士民
感公之德遂構祠而肖公像以祀之始名楊公祠後公
提師入漳行部過浦士民喜公之再臨也又重新之更
今名百年於茲矣歷時旣久漸就傾頽今年春邑侯徐
君尙忠謀葺治之民樂趨事不逾時而廟貌煥然適余
請急歸省而丐余記之余惟公之勲績在國史德澤洽

民心固無俟于余文而余文亦豈足以重公者雖然吾
浦人甘棠之遺愛也其何敢辭公諱捷字元凱先世隸
籍維揚遠祖於勝國時仕遼因家焉遂世爲義州人其
祖父伯叔皆以門閥技勇起家一時家聲藉甚公年十
六卽能挽強命中結納英豪不事家人產維時內外交
訂制院洪文襄公循地望擢爲偏裨我

世祖皇帝入關剪逆定鼎以材勇異等除授山西撫標
中軍遊擊繼任宣大副將援剿兩廣遂擢九江總戎恢
復江西郡縣會師廣東恢復潮城隨征福建江南提督

山東凡歷數省皆有剿禦寇賊底定邊疆之功是公之
勞績半天下非特一邑一郡之爲烈也而我浦人願獨
有私於公者則何以故蓋公兩次入漳在前甲午之冬
以左都督充福建右路總兵官仗鉞以前戰無不克遂
底漳浦海逆雖皆奔竄而郡邑名城率多折毀無險可
恃狂狡不難乘機不突公至卽相舊址計工程課徵楨
幹具板築匝月之間垣墉雉堞言言屹屹爲他邑先浦
人賴之若防之制水恃以無恐是公之大有造於浦也
粵康熙戊午海逆復煽據厦爲巢繼掠漳泉屬邑所至

不守斯時也浦民望公若望歲焉日夜以幾公復奉

命督師入閩時制院姚公在漳羽書接踵請援公相緩
急機宜以爲非先安泉而卽援漳將有腹背受敵之虞
故旣復惠安解泉圍而後疾驅至漳與姚公商破敵策
是冬卽會兵克復江東橋萬松關已未春賊踞險立巢
以防我公絕其掠食要道勢窮益猖獗公帥師逆擊之
遂潰又遣將焚毀其舟生擒僞將賊勢益感庚申二月
賊分據扼要立十九寨以拒我師復聯絡重地以壯聲
援公用計出奇破其所恃令首尾牽制難以四應乃會

師攻復海澄賊遂大窘隨乘勝飛咨督撫鎮將訂期三路進攻廈門擊破賊艦敵淹死無算數十年逋寇逆窟一朝頓清是公之大有造於漳卽更有造於漳者也此浦人之所以沒世不忘也閩逆旣平

天子以公年老有疾仍調還提督江南以便調攝公在江南前後十五年尤多異績不具詳公少際亂離書知姓名未能竟讀而用兵暗合孫吳生平馭兵威而有惠于民瘼尤加體恤所以士樂用命而所至謳思自公去後國家承平無事文教誕敷公子孫繼繼承承敷歷

中外而皆以文事世其家今年夏公會孫景素適來觀
祭是邦因巡屬邑至浦瞻拜祠下徘徊久之喜浦人之
不忘舊勲而能念公之德於不衰也浦民亦焚香載道
樂公之有後將世修其德而重有造於吾浦也是又觀
祭君與我民維繫無窮之心也夫因并記之

墓誌銘

叔父納山府君墓誌銘

乾隆三十年乙酉五月叔父納山府君之柩將以月之二十九日葬于龍跡之原其孤涵等泣而請曰吾父之沒也二十有四年矣而始克葬葬不可以無銘厥惟子宜嗚呼新于府君猶子也府君于諸子獨愛新諸子中知府君深者亦莫如新其何敢辭府君諱垂遠字立三晚自號納山世居漳浦爲累贈資政大夫刑部左侍郎歲貢生安溪學訓導君晦公子誥贈通奉大夫內閣學

士兼禮部侍郎庠生季湛公孫誥贈通奉大夫內閣學士兼禮部侍郎鄉貢進士百梁公會孫曾祖妣黃氏祖妣林氏俱贈夫人妣李氏累贈太夫人資政公三子長卽先大夫贈侍郎公早卒次仲父庠生例贈文林郎翰林院庶吉士雍正己酉遊國學應京兆試卒于京師府君行三少嗜學資政公鍾愛之友教四方每挈與偕行爲文章雅自修飭年二十九補弟子員旋充增廣生凡九試於鄉皆不遇慨然曰是有命焉吾能安之遂不赴終諸生天性孝友內行醇篤康熙己丑丁母李太夫人

憂哀毀骨立旣免喪始授室資政公悉委以家政府君
竭力備孝養親承色笑不離晨昏懇懇如孺子慕疾病
調藥餌抑搔扶持曲遂願欲時新已成童日侍資政公
側親見府君所以順適親心者無所不用其誠凡曲禮
少儀內則諸篇之童而誦習者一一見之躬行至老不
衰而畧無勉強拂抑勞倦之態嗚呼爲難能也已雍正
乙巳資政公司訓安溪新與仲父偕行公命府君留營
家計府君不忍離左右同往至官舍乃告歸閱歲公得
病再奔赴輪侍日夜扶歸還居憂三年盡禮暇則率諸

子登邱隴相宅兆卒得吉壤以葬時仲父已沒皆府君
獨任也平生剛直自喜不能嬖媚隨俗遇貴顯人尤不
少挫然貌如其心不藏蓄爲城府人亦卒無怨者晚授
徒于家四方從學至者皆卓然有立以乾隆七年三月
十七日卒于家距其生戊辰五十有五年實康熙二十
七年也配孺人劉氏生子四人曰涵曰元寬庠生曰澧
曰長濤女二人孫男十二人長光邦庠生餘皆習儒業
曾孫一人府君之沒也新宦京師不得親視殮舍聞訃
爲位哭之盡哀而止及今葬得與執紼回憶生前撫

姪如子而獨篤愛新者今其已矣撫穴增悲痛靡極也
因系其世次而銘之銘曰

晦其跡豐其德行成于家遇則嗇以貽其後人而繁祉
是錫

新刊

多

三

光祿大夫總督倉場戶部右侍郎水南彭公墓誌

銘

乾隆四十年四月二十三日少宗伯彭公卒於里第厥
嗣冠具狀來請銘予與公同年成進士同入詞館同朝
列交四十年今又與冠同值

內廷兩世交情知公最深義弗可辭則據其實而書之

公姓彭氏

諱

樹葵字覲之水南其號也先世自江西廬

陵遷河南夏邑世有名德五傳而至公之曾祖

諱

舜齡

順治己丑進士任登州推官署知府事祖

諱

溶知都勻

府父

諱

嘉問康熙辛卯舉人

贈封皆如公官公生而英特讀書數行俱下年十六補
邑學生雍正壬子舉河南鄉試乾隆丙辰成進士改庶
吉士明年散館授編修充八旗志館纂修官五年擢侍
讀六年充

日講起居注官擢翰林院侍讀學士旋遷通政使司右
通政使太僕寺卿宗人府府丞八年遷都察院左副都
御史九年擢總督倉場戶部右侍郎十二年署理湖北
巡撫旋實授十四年仍調倉場侍郎二十二年調禮部

左侍郎旋以前任巡撫時失察事罷歸二十五年恭祝
皇上五旬大慶

特賜三品銜公之受

上知也自進經史講義始以爲人君之德在於慎思引
魏徵十思疏內語剴切敷陳演爲十箴以獻

上嘉其得古人箴規意於是屬意公可大用而公之進
身以正不愧前賢亦於此畧見一斑矣其後出入爲卿
尹所陳奏皆切中利弊得

旨俞納者尤多在倉場時北運河坍塌漲靡定向動用旗

丁紅剥銀兩設淺夫開浚復築草壩以蓄河流公言草壩當山水漲發一注卽衝紫草蕩漾更多阻塞水小則中流甚淺無從收蓄宜概行停止仍以紅剥銀兩給還旗丁爲起剥之用大通橋設車戶運米石出一錢津貼米倉散役之費後車戶工值裁減而津貼如故私逋日多公奏免之又請增剥價及淺夫工食以速漕運定坐糧廳茶果銀之額以杜浮冒停舖販松板之徵以舒丁力遇京師米貴輒請平糶或先期放甲米以濟民乏先後皆被施行其撫湖北疏言荆襄一帶江湖袤延千餘

里一遇異漲必藉餘地容納今漢水由大澤口分派入
荆夏秋汎漲又上承荆門當陽之水匯入長湖下達潛
監瀾漫無際三襄之水濁而多沙有力者截流成淤繼
且築堤成垸人與水爭地爲利水必與人爭地爲害請
飭各州縣於冬春之際親勘現垸若干著爲定數此外
禁其復築庶幾水患可息嘗因穀貴請常平暫停採買
而以穀價貯庫遇偏災則銀穀兼賑且穀貴卽當出糶
亦不宜拘存七糶三之例社倉置穀舊貯社長之家公
以稽核不便請於七升息穀內動支變價建倉收貯

奏行人皆便之公遇事精勤凡所區處必盡其當而大
意務以實惠及人十二年山東歲歉

上念民有流亡者命公於通州留養公設法招徠吏胥
咸感動無侵蝕者民就食至數千咸泣且語曰大人活
我大兵征金川公在楚當調兵四千乃料軍實借帑金
爲製行裝備冬衣軍士無不歡呼就道常攝總督事委
官調餉諸務紛集公晝接屬吏夜治文書事無鉅細皆
手自擘畫幕僚神手而已性高潔服食儉樸不異寒素
所至未嘗名一錢去任後有以隻雞斗食饋者置門內

不告聞者而去曰告則必不受也旣家居閉門却掃手
一編呶唔不絕自校讐所爲詩文集外更輯中州詩選
喻言集古二書若干卷公生於康熙四十九年九月二
十七日年六十有六配張夫人孝慈勤儉克相夫子以
廉潔相敦勉先公四年卒年六十有二乾隆三十八年
葬於城北雙橋村先塋之次今卜於乾隆四十一年某
月某日厥嗣冠選奉公柩合葬冠乾隆丁丑進士
日講起居注官入直

上書房翰林院侍講選廩貢生候選訓導孫男五驥驤

駿鯤瑞皆幼銘曰

高高之靈有偉惟公厥初獻納以正以忠旣宣茂猷小
大畢舉靡疾不除若手斯撫公退而歸有聞在人入朝
於京皤皤老臣

天子優公曰惟舊德公老於家鄉邦是則公亡若存嗣
也代興有勒於幽千歲其徵

朝議大夫福建臺灣府知府武定李君墓誌銘

始余識武定李君於比部見其人精明沉毅治事周詳
心竊異之其後厯官吾閩政聲尤著沒旣數年其子宗
蕃以行狀來請予銘予於君爲部民歌愷悌志去思鄉
父老事也況余之識君尤久者乎是不可辭按狀君

諱

師敏字仲堅號允堂先世自棗強遷武定數傳而至君
之曾祖文襄公以名進士敷厯中外平逆藩建偉績事

載國史官至

文華殿大學士生君之祖義園公

諱

宜麟任陝西驛鹽道父濬洲公

諱

壽瀚任甘肅鞏昌府

系表卷之三
西固同知累世皆膺

誥封如例君兄弟五人於行爲仲少穎悟絕人授書輒
解大義隨父濬洲公厯官楚秦自七齡至弱冠咸僕僕
道途間然嗜學若渴日炙雨淖中猶雜誦不輟乾隆十
八年舉順天鄉試明年以登明通榜授臨朐教諭二十
二年成進士分試刑曹掌提牢事期滿補湖廣司主事
遷福建司員外郎旋擢本司郎中充律例纂修官二十
九年以母憂去任服闋補安徽司郎中三十三年出知
福建興化府閏三月調知漳州府守漳四年護汗漳龍

道者數月調知臺灣府任二年以疾卒於官君生有幹
濟才而含聰斂耀簡重無浮言十四歲隨濬洲公通判
蘭州卽以署務委付濬洲公終於西固同知任君哀毀
幾至滅性而經營公私秩然就理固民咸感歎以爲神
君有子初任教諭卽以振興學校爲事其在刑曹先後
凡十年大小之獄無不推見至隱稱情比罪務昭平允
嘗三迎母杜太恭人至京匝月卽歸戒之曰雋不疑何
人哉吾不敢比不疑母然汝能勉效古人吾青蔬白飯
心自可安不必迎養爲也以是日益振勵遇事無一毫

輕率心時有以夫妻細事構訟者獄已具矣君獨心疑
其人欲再鞫之同官皆不謂然後竟詰得其謀殺前夫
事衆方嘆服其掌握牢歷四司每遇秋審堂官必委總
其事京察俱列一等由是得邀

主知嘉其能事以爲有發奸摘伏才而君不矜不恃終
不欲以刑名自信及其出知興化僅三月上官以各縣
疑獄委理彌月卽結百餘案漳州守缺

上命於通省知府內遴君調補益重其任也漳地處海
口君首以編審爲務奸匪不得遁其迹漳浦逆民李宗

閔等造僞劄糾衆不法君及其未發也擒抵罪平和之
民王添送等聚衆覆鼎山亦先幾捕獲三十六年郡大
水深者數丈漂民廬舍無算民之避於城於山者胥噉
噉仰號君爲別異男女招城中戶備餽糧駕舟親往哺
之存活數萬人往來泥淖中率丁役護民舍閔兩旬始
定調臺灣漳父老子弟遮道攀送擁肩輿不能進者彌
日嗚呼卽漳民之歸向而公之治行可知已其守臺灣
以番民雜處裸體跣足者性獷悍不靜爲別族類禁攘
奪敬刊

聖諭廣訓於各村里躬行宣講期月間隱隱向化沿山
生番雜處不時出沒顛越人民之無籍者亦乘間剽掠
君爲立望樓一千四百餘南自達谷山北至大小雞籠
皆設征柝置戍夫丁壯循環更代復示以守望巡警法
釐然皆有程度甫閱月卽有盜劫於途如法緝之獲首
縱置於理自是萑苻屏迹俗尙結社祀神晝散處夜編
竹爲炬千餘人聚而喧往往滋事君嚴禁之終其任無
敢蹈故轍又鹽法壅滯課日絀商民交病君招商會賈
不限以額數多寡從其便境中遂無行鹽累其他理事

一如治漳而臺灣視漳尤劇君一手改判漏下三十刻
始就寢初以癸巳年染時疫元氣未復至此則體益弱
病遂不起而臺民之思君固無異於漳民也君先後兩
遇

覃恩

詔授朝議大夫生於雍正三年十月二十三日卒於乾
隆三十九年十月十二日年五十原娶徐恭人生女一
繼娶呂恭人生子六今存四宗蕃宗衍宗穀宗魯於乾
隆四十五年四月十七日宗蕃等奉呂恭人命啟徐恭

人櫟奉君柩合葬於城東王官莊之新阡銘曰

我我文襄庸勲在閩明德之後世有達人曾孫繼武克
敬克承入理祥刑出爲太守太守之來閩人翹首蘓枯
剔蠹碑在人口北溪湯湯東寧泱泱誰徵遺愛維臺與
漳余漳人也銘君茲石永固汝藏曰惟南國之棠

亡弟瞻亭墓誌銘

弟諱

觀瀾字季澄別號瞻亭宗伯文勤公第三子公以

甘盤舊學上契

主知長子長漢刑部主政次長湮歷官兵部侍郎皆荷
特恩加殊擢弟年少穎異讀書輒能領悟侍母劉夫人
至京師時文勤公以正學倡天下門無雜賓所交遊皆
當代鉅公弟朝夕侍側日聞緒論學以大進讀禮後應
京兆試

欽賜舉人一體會試五上公車未遇會大挑舉子列一

等例以知縣用

特恩授刑部主政蓋異數也在西曹五年勤慎奉職由主事歷陞員外郎中兼攝三司及總辦秋審多所平反自大司寇以下咸倚重焉有不可必力爭同列皆咋舌不敢出一語弟侃侃陳言卒得請蓋上官亦信其無他也每京察皆列一等辛巳授江西道監察御史奉命監賑以人多米少奏添米石併懇勅下各廠查議上可其議全活甚衆旋以叅劾失當鐫二級時仲兄任少司馬每公退兄弟怡怡間以朋好詩酒自樂不自知

其未補職也踰年仲兄沒弟哀痛過情

天子念文勤公諸子無在朝列者仍以弟補刑部員外郎弟益感激自奮泣曰

士以父兄之故棄瑕錄用

小臣

何敢不力竟以積勞成

疾得痿痺之症踰年告歸時余讀禮家居相見執手歔歔涕數行下其明年余服闋入都弟養疴林下每書信往來皆力疾手書不異晤語壬寅余再假省墳墓弟猶無恙筍輿過從談吐如疇音癸卯余還朝弟送里許執手垂涕神色慘然若將永訣者余慰之曰弟無恐正

易所謂貞疾者也吾老矣不能宣力

朝廷當乞歸吾兄弟尙冀再相見也嗚呼孰意其不及
待哉甲辰夏弟仲子本崇復蒙

恩欽賜舉人報至已在床褥尙能叩首嗚咽閱數月而
逝嗚呼痛哉平生篤倫理厚親故事兄如父待弟姪族
黨有恩尤重友誼與人交無貴賤皆得其歡心謝病二
十餘年朝之公卿僚友咸歎惜不置參苓藥餌之資不
遠千里而來餽者無虛歲嗚呼亦可以見弟之爲人矣

生於

年

月

日卒於

年

月

日生年七十一歲娶宜人沈氏淑慎宜家 公女後

一年卒子 人女 人孫男女 人嫁娶皆望族以今

年正月 日合葬於 山之原坐 向 孤本端等

請余誌之幽系以銘曰

若考作室子肯構也胡時旣過而施未究也非不永年
惟貞疾之爲疚也式固爾藏子孫之佑也

...

...

...

...

...

...

知臨潁縣琢菴張君墓誌銘

乾隆二十有七年考選內閣中書勅授文林郎歷知五
縣權府事琢菴張君與其配陳孺人將合葬於母陳太
孺人之兆其仲子壽蓀余姊壻也次其行畧使來請銘
曰願有以誌諸幽余不文然不敢辭君諱字季長

琢菴其別號也先爲平和人後徙南靖再徙龍溪居郡

城南祖

諱

某累贈奉政大夫考

諱

某號恥菴康熙庚戌

進士歷官刑部郎中晉封朝議大夫當耿逆之變海氛
復熾鄭氏餘孽蹂躪泉漳二郡公設計捍禦總督少保

姚公廉公才望悉委重焉渡海招撫降其渠帥數十人
以軍功議敘加正一品朝議公生七子三福衍戊辰進
士官吏部驗封郎中四福永丙子舉人歷任知縣皆有
聞於時君行五少穎異十一能文章朝議公尤篤愛之
年十五餽於庠名與兩兄埒中乙酉舉人丙戌計偕至
京師遭兄司封君之喪哀痛逾禮偕四兄扶櫬回籍自
是不應禮部試者累年事朝議公以孝聞綜家政暇則
博覽經史子集詩賦古文尤工書法大中丞張清恪公
延致鰲峯書院凡所著作亟加稱賞雍正癸卯試禮闈

不遇時新從父宗伯文勤公承直

內廷與相國高安朱文端公方以實學倡天下同修歷
代名臣名儒循吏等傳而獨以循吏傳屬君草又留君
同訂古文雅正一時名公卿咸推重折節願與交用相
國桐城張文和公薦授江蘇元和知縣調長洲以漕糧
霉變干吏議雲貴總督宮保尹公奏請引

見得

俞旨命隨往雲南授保山知縣權知永昌府丁內艱歸
服闋補河南武安知縣尋調臨潁君爲政精敏仁明持

大體凡有興革關民生利病者毅然爲之無回惑在長
洲時某寺僧末師不法藏匿婦女爲奸利君廉得其實
具詳上官將寺租廟宇售其值以贍書院諸生之不給
遠近稱快在保山興脩水利捐俸六百兩開黑龍洞溉
田數千畝又捐金五百建置義學田租在武安臨潁俗
稍淳尤慤慤以愛士恤民爲急充河南鄉試同考官所
得皆知名士蓋君學有根柢而爲政知所先後類如此
性孝友輕財重倫理筮仕以後所得俸餘悉均母弟二
人無私積婚嫁猶子女不分畛域君之令雲南也母陳

太孺人尙在以滇閩路遠不能迎養旣而以憂歸君
毀悲痛如孺子慕經營窀穸得郡城東郊竹子林之原
顧謂諸子曰茲地穹敞異日吾夫婦祔此以終事母其
孤識之不忘乃以今年某月某日奉君暨孺人柩合窆
焉遵治命也卒時年七十有元配陳氏勅封孺人有
淑德與公相莊五十餘年先君某年卒子六人女幾人
銘曰

惟吏而儒惟循匪迂惟孝友于沒身以不渝若堂若斧
鬱鬱幽墟兒兮依母婦其從姑勒銘于石視此孝德

封修職郎文臺林君墓誌銘

林氏自唐九牧以來爲閩中著姓其在漳浦者居海雲之麓去邑東十餘里稱烏石林氏科名甲第爲一邑冠君諱在田字叶文自高祖以上多顯秩再傳至君考諱

江譽以明經司訓永定調諸羅兼署彰化所至訓迪有聲君兄弟六人長早世君其仲也與弟四人皆自弱冠有文名雍正甲辰余與君兄弟同應童子試受知郡守北平耿公旣三試耿公廉知君四人者同懷兄弟也引至內署局扉四人者左右分坐疏布席而以余介其間

自起草以至收卷耿公咸在視比揭曉君四弟香等居
第一余次之君與兩弟某某又次之謁見之日耿公謂
余曰汝文宜冠多士然林生四人者同懷兄弟也德星
萃於一門子宜讓之自是君兄弟文名大噪余與君兄
弟交日益篤君於書無所不覽尤愛邑先正石齋黃先
生書博綜條貫爲文章奧衍奇崛詩賦古文操筆立就
不專事舉子業厯試皆高等督學而外自郡守監司以
達於制撫凡有文名知敬愛士者必亟賞嘆慕不置積
餼貢成均幾三十年邑侯長公聘王義學爲一邑師前

後十六載所陶成樂育皆有名於時尤嫻經濟多幹畧
邑有公事必率先擔荷修文廟建紫陽祠清陰陽二
渠培地脉皆不辭勞勩當事咸禮重之人謂君文堪著
作之任而不入承明才可爲世用而以明經老人才之
在世也生之艱成之又如此其舛嗚呼爲可慨也夫性
孝友同氣六人庶弟尙幼撫養教誨以至成立餘皆先
卒孤寡咸賴之營先人窀穸必躬親晚以仲子虎榜任
學官勉

封修職郎如其官享年六十有八以疾終於家實乾隆

卷之二
二十七
二十七年壬午九月二十四日也娶許氏

贈太孺人子四長龍墀太學生次虎榜拔貢生俸滿臺
灣彰化教諭候推知縣俱許太孺人出三鵠行太學生
四鶴書俱側室朱氏出女一人孫男女若干人曾孫一
人婚嫁聘字皆士族君沒之三年乙酉十一月朔將合
葬于烏石本鄉某原屆期仲子使以狀來曰君辱與先
子兄弟遊又辱爲姻親願有銘也敢以請余憶自總角
與君兄弟友今四十餘年矣君之五弟先亡季與叔亦
相繼以逝余皆在京師今之歸所相與道故者惟君耳

而又銘君嗚呼其亦重可悲也夫銘曰
士靡於時文弊體卑君獨好古先正是追士泥於古匪
迂則腐君又達時不茹以吐何文不爲國華長才而未
竟厥用我銘以貞之亦惟衆之所共

奉政大夫拔亭朱君墓誌銘

乾隆五十一年丙戌十一月庚子奉政大夫楊州江防
同知歲進士拔亭朱君卒六年矣將以月之二十六日
偕元配蔡宜人合葬於岳坑之員堆山君生前所自擇
遺命屬諸孤者也先期其孤耀介其次孫弼使以狀來
請曰願有銘新居憂廢業者兩年辭不獲命蓋封翁於
新爲姑夫宜人新同堂姑母也旣熟悉其家世行事其
敢固辭君諱允泰字階平別號拔亭世爲平和鶴坑人
祖諱興孔以清德重於鄉父諱拱字藻伯候選州司馬

以孫貴馳

贈奉政大夫有子三人君居長生而穎異

甫成童博通經史所與遊皆當時名宿旣補弟子員隨
外舅蔡恭靖公主共學書院因得盡交閩士之秀者平
生讀書鄙章句小儒不識時務好談經濟爲用世之學
慨然欲友天下士乃循例歲薦將往京師赴成均肄業
未幾以祖母得未疾佐父侍湯藥不果行庚寅丁內艱
旣服闋而祖母年益高侍奉益謹自是二十年間不出
鄉井丁外艱哀毀劬幾於滅性蓋其至性敦篤孺慕
之誠雖三公不以易迴憶生平慷慨有大志思建樹於

當時至是鬢髮鬢髮忽忽幾六十矣顧謂諸子曰吾壯年志在四方以奉侍祖父母父母不敢馳情遊宦今已就衰將無所用於世也汝等勉之乃遣長子輝入京用蔡文勤公薦蒙

恩發往河工旋授江都知縣君遇

覃恩封文林郎擢江防同知晉

封奉政大夫如其官君既絕意仕進益放情山水習陰陽家言凡山川名勝登陟不遐遺庚申赴瓜州就養遊金焦溯大江登鍾阜歷覽金陵諸形勢逾年而歸迺建

宗祠立四親廟自始祖以下咸修廟祀素剛毅方正待族衆嚴而有恩事無大小悉咨以行兩弟早喪撫孤子女如已出與宜人相莊白首無間宜人婦順婦德纖悉無遺憾懿行具君所撰行述中先君十五年卒君哀痛不禁長子江防君以內艱歸亦遭癰患逾年而沒君益不自持晚歲元孫生五代相見族戚稱慶而君自喪長子以後時鬱鬱不得意以乾隆二十五年六月四日卒於家距其生康熙丙辰八月十四日享壽八十有八宜人人生於康熙十七年卒於乾隆十年享壽六十有八

子四人銘曰

才不世遇非窮穀有子不於躬諧厥配同歸藏員者堆
馬鬣封鬱蒼蒼松耶柏樂斯邱安窀穸從治命孫子賢
貞珉石千萬年

明臣丁鶴年

具題江蘇蘇州府知府學訓導李國華等

奏為世宗憲皇帝神聖不測神恩聖訓國祚萬

古

臺灣統兵叅贊大臣福建陸路提督世襲輕車都

尉又一雲騎尉萇谿藍公墓誌銘

乾隆五十二年八月十八日臺灣統兵叅贊大臣福建
陸路提督世襲輕車都尉又一雲騎尉萇谿藍公卒於
軍奏

聞

天子軫悼加贈

太子太保賜白金一千兩治喪卹典

如例先是五十一年 月臺匪林爽文倡亂戕殺官民
攻陷城邑臺地一時無備賊勢甚張泉州廈門水陸二

提軍皆東渡

上以內地闕大員彈壓調公入閩時公提督江南駐松江府聞

命疾馳二千餘里未十日至福州授福建陸路提督旋調水師復奉

命爲叅贊大臣提兵渡海駐鹿仔港時前後皆賊營彌布水陸公親督將士旬日間力戰數次多有斬獲慮兵力不足奏調漳兵二千又密遣間諜與賊夥諳委者陰入賊巢說諸脅從聯諸村莊給與小令旗約以官兵一

三執此爲內應部署既定方冀厚集兵力刻期進發未
就而疾作憤懣不自顧惜力疾督戰病轉劇猶乘竹兜
子指揮軍士諸將勸以暫息調養公曰吾受

恩至於如此奈何以病誤茲大事耶將易簣時猶誦杜
工部出師未捷身先死二語囑諸將曰吾在軍卽以征
衣殮死而有知也必來殺賊言訖而逝無一語及私可
謂以死勤事者矣公諱元枚字卜臣世爲漳浦人居甚

谿因以爲號藍於浦爲著姓前明時有諱銘球者官侍
御厯宣大三邊湖廣巡按入

本朝以來族祖義山公

諱

理以平臺功官福建水師提

督諸弟皆將帥公祖

諱

廷珍少隨義山屢立戰功爲南

潯總兵官辛丑朱一貴陷臺灣總督覺羅滿公用爲先

鋒七日克復臺灣功第一授福建陸路提督世襲輕車

都尉卒諡襄毅以上三世皆贈榮祿大夫妣皆贈一品

夫人父

諱

日寵銅山營叅將

誥贈建威大夫江南提督如公官妣蔡氏禮部尙書文

勤公女

誥贈一品夫人公幼聰敏端重如成人初襲職發廣東

候補歷署肇慶春江協副將補海門叅將陞龍門協副
將調澄海皆能其職用龍門任內拿獲逃犯功陞金門
鎮總兵官丁內艱服闋補授崇明鎮總兵官四十七年
崇明大水異漲漂溺死者以萬計公會同巡撫閔布
司吳計議賑卹晝夜巡視全活甚眾辛丑甲辰
皇上南巡兩辦

大差

召見奏對皆荷

俞旨奉

命扈 御舟行爲護衛蓋異數也四十九年江南提督
上下兩江水陸七十餘營軍政肅清兵民輯睦值歲大
飢嚴檄各營防緝盜賊全省宴然平居坦易不事矜飾
所至無赫赫名而去後皆謳思不置臺訃至江南官民
爲位而哭互相弔唁知公之入人深矣當公之未渡臺
也漳浦有林吳二姓終年械鬪官不能治公星馳至浦
督緝又土豪許姓欺凌弱族藉命搶奪一空公遣營員
擒捕十數人悉置之法自是豪強斂跡俗爲一變性嗜
書通文藝經史子集靡不究覽凡奏摺文移書札往來

皆操筆立就不假手他人卒時年五十有二娶蔡氏侯

選州同知

諱

長湜女

誥贈一品夫人先公卒子八人

長誠娶蔡氏太學生本樹女次恩次振俱早卒次傑娶

趙氏邑庠生錫女次得勝娶蔡氏予告大學士孫女太

學生本份女皆蔡夫人出次魏次玕次琛俱側室出尙

幼未字女四人一適蔡

一適林

一適蔡

一未字孫男女六人以今年三月二日合葬於某鄉某

原系之銘曰

逝矣東寧實維巖疆公家懋績世載旂常昔在義山血

系
卷之三
戰拖腸曾是三紀一貴跳梁桓桓襄毅七日三捷鹿耳
鯨身如履平闢爰及我公維苞有藁

天子曰咨繩爾祖烈力疾視師匪躬植節殲以征衣英
魂不滅遺言在耳部曲悲咽

帝鑒公誠贈賻寵錫宮保榮階崇班載陟更

諭禮臣厥終允飾罔阜蒼蒼堂斧翼翼勒銘幽宮以爲
臣則

鄭近菴先生墓誌銘

乾隆甲辰余典試禮闈得進士若干人龍溪鄭生玉振
與焉其明年余請老歸田鄭生需次在家時相過從益
悉其家世今年春狀其尊人行畧來乞銘於余并舉南
豐曾氏所稱道德文章足以行世傳後爲請南豐之云
非余所能勝顧以通門之誼其奚敢辭君諱兆福字啟
祥近菴其別號也其先世自元至正間一世祖均賢始
居古縣數傳至明中葉族始蕃以甲科登顯宦者甚衆
或別建里居獨君以上一脉仍處舊鄉至今爲古縣鄭

氏大父

諱

質以耆年碩望重鄉里一堂五世及見曾元

百人父

諱

宗岳國學生子四人君居次幼端重舉止若

成人同郡孝廉許長人先生余同年友也一見知之遂

配以女二十三補弟子員君自爲諸生卽慷慨以才氣

自豪務爲有用之學不屑屑於制舉業日究心史傳中

應時濟世盤錯諸大端暇則危坐一榻手書古人奇節

偉行粘壁間晝考夜思以故事無巨細皆能得其竅卻

議論古今可見諸施行凡有疑難徐出一言以定自君

沒至今垂二十年鄉族多故諸父老咸曰使近菴若在

事不足爲也又曰近菴在日里有豪強必摧抑之而右其善良者俗以不偷何今之不然也嗚呼此可以概君之生平矣與人交不負所託險阻無所避見不平義形於色若拂抑之在已也必爲力伸恒面折人過人多憚之然事平又未嘗不心服卒無怨者性至孝考晚年得脾泄病凡易褻衣滌便溺器必躬親母嘗遣人代之君愀然曰委之人不能悉當吾意況親心乎且見惡穢退或有難色余不忍也其他色養類如此屢困場屋不少挫然亦不能俯就有司繩尺終以不遇益勤家政建宗

祠置祭田獨身任之嘗議修族譜行古宗法未就而卒

時年僅四十有六娶孺人許氏雍正壬子舉人

諱應元

長女年十九于歸逮事祖父母父母能得歡心其在婦

職之常不悉書書其至者君性剛閑家或檢束太過孺

人默爲調護婉婉周慎能使娣姒感悅無間大易所稱


家人嗃嗃其悔厲之吉爲難能也又君在時孺人訓諸

子不嚴而寬君沒則不爲寬而爲嚴嘗曰

讀

身名教爲無忝隨分及物爲有用否則無

呼此豈中輟之流所能道及哉宜玉振述之



下也後君十二年而沒享年若干男子六人玉振甲辰
進士玉颺玉書俱武學生玉瑛業儒玉璇玉衡俱國子
生女子二人孫男十一人孫女六人將以某年某月日
葬於某鄉某原系以銘曰

嚶嚶志古嶽嶽懷方好是正直其動也剛嚙枯振困式
過雄張有諂無忤終焉允臧刑于之孚天立厥配威如
交如健順以濟勒銘幽宮邦家維則千載弗渝貞此珉
石

新齊文集

卷六

七

葉長曹太君墓誌銘

海澄進士葉君廷推以教授司訓龍岩州乾隆二十二年以母老丐歸侍養於是日太君年八十七矣色養又八年而卒享壽九十有五其明年九月將合於贈君繹軒公之兆冢孫內閣中書舍人文馥以教授命奉狀來請余銘余與教授交久又常一至其鄉熟悉其家世事其曷敢辭太君姓曹氏系山元進士諱用之裔儒士諱女也年若干歸贈君嫺女誠守禮明義恭儉而仁恕與贈君相莊白首無間言當于歸時姑劉安人已沒

舅實園公性方嚴太君婉婉承事曲得歡心襄大事尤
盡禮贈君兄弟五人同居共食太君介居娣姒通有無
勤操作嘗脫簪珥以營伯氏之難嫂喪逼炎暑手大小
殮衣被哭之目盡腫事庶姑尤加謹庶姑林安人常病
手躬爲梳櫛下至中幫廁櫛親自檢滌後庶姑以壽終
遺命二女子曰嫂氏賢孝事我如事姑汝事嫂當如余
聞者皆感泣待臧獲嚴而有恩婢女髮覆額必擇配嫁
之教諸子以義方教授兄弟偶有差失輒長跪受教誠
不少假詞色性儉約一縑袿禮服數十年不持齋佞佛

而每却葷羶至賓朋祭祀必豐以潔凡贈君營宗祧拓
祀田惠鄉里匡困賑貧悉竭力贊成之無吝容亦無德
色蓋大義明而天性厚也余自庚辰春一至海澄過其
鄉與教授道故登堂問太君起居留宿大觀山房因與
陟山巔周視鄉里其衡宇質朴其羣從恂恂雅飭少長
有禮其邱隴墳墓皆在山麓不惑葬師遠圖吉壤教授
爲余言自其先世以來居喪不用浮屠村俗迎神設醮
諸妄誕不經無關典禮者悉禁絕巫覡僧道不得有事
於鄉環所居數十年無博塞者雞犬無驚夜戶不閉余

聞之爲太息也又鄉有婦順之教凡勃谿詬誶議罰有
差至今里閭中婦姑妯娌無敢反唇相稽者嗚呼此豈
未俗所常觀哉用是知贈君之教行於鄉而太君之能
以身範也太君生於康熙某年月日卒於乾隆某年月
日子男六人長晃華贈徵仕郎次禹功加都司俱先卒
昱章馳封徵仕郎景章昇章俱國學生廷推甲戌進士
卽教授也太君先以都司受恭人封至教授以文階封
太孺人女二人皆適士族孫男十有八人文馥昱章出
嗣伯兄晃章爲後今爲承重冢孫卽中書舍人與教授

癸酉同登鄉薦者也文舟文載俱庠生曾孫男四人太君旣以上壽考終諸子孫又皆克守先訓以孝友世其家食指千餘同黼共黻有江州義門之風焉嗚呼弗可及已因次其世狀而繫以銘曰

易稱无成而云代終二南之化江漢以風何末俗闡教不彰而厲階孔長大觀之麓厥風洵美孰使之然惟太恭人之軌旣享遐齡亦膺多祉穀也佐君子以永終歸也從先夫之堂斧我銘諸幽以貽其孫子以垂休千古

世爲武王之望者其後嗣以却其平以產於子古
 各人之節因平以故而自是武王而後平以平其
 小者而謂之平其大者之平其平其平其平其平
 史氏氏知而平其平其平其平其平其平其平
 和故下文曰因平其平其平其平其平其平其平

卷之四

緝齋文集卷之七

漳浦蔡 新葛山

墓表

副都御史巖溪傅公墓表

乾隆三十五年四月副都御史巖溪傅公有疾在告越月薨於第時公長子峻還滇次子疑以予之素稔公也賁狀請表其墓憶壬戌癸亥間公居閒京師余時在館職於公爲後進公顧與余爲忘年交偕同志雷翠庭鏤劉蘭谷芳藹李韋園清芳黃靜山永年陳體齋仁鍾勵

暇晚六七月訂數會會必課所學考鏡得失旁及古今治亂人才盛衰學術事功之邪正文章之真偽咸各舉所見辯難究詰衷於一是而公尤慷慨自負每及古人忠孝大節直言讜論必掀髯奮袂畢然有尚友千古之志以故公平生行己立朝居言路往往不負所學亦其天性然也公諱爲竝字嘉言號謹齋別號巖溪滇之元江人中雍正丙午舉人癸丑成進士乾隆戊午由翰林檢討授貴州道監察御史尋擢奉天府丞未幾以奏請廣奉天學額鐫級歸辛巳再起補光祿寺少卿踰年

遷鴻臚寺卿丁亥陞大理寺少卿宗人府府丞都察院
左副都御史人咸以晚遇爲公榮謂公將大用得行其
志惜乎公竟迫暮而遽嬰疾疾以終也卒時年七十公
之爲御史也首以請補明季殉難御史趙譔贈諡事下
禮部議覆准行賜諡忠愍譔公鄉人也官京師以罵賊
死先是公與同輩計偕至京拜趙墓於城西偏仰天嘆
曰公義烈如此而贈諡弗及邱壟沒荒榛吾異日得爲
言官當沐浴首陳此疏至是果如其言其年五月
詔求直言公益感激思奮直陳萬餘言其大要在去奸

民端風化清獄訟祛冗蠹申法禁皆關 國家大計併

請令在廷諸臣如翰林曹司皆得矢謨入告言雖未盡

用論者以爲有古名臣風烈云在奉天攝學政奏立書

院請 旌王瓚孝子皆有關風教在鴻臚奏請復謝恩

官慎選學習序班一時稱便最後居憲副佐持風紀慨

然以整肅臺綱爲已任謂御史爲 朝廷耳目不宜兼

官郎有乖體制疏請停罷以符名實得

旨允行著爲例而所惓惓不忘者尤以言路爲重披瀝

瀆陳亦其忠愛之心有迫而然不自知其過計也昔朱

子有言一日居乎其位則一日業乎其官若公者可以無愧矣初公閒居時名重公卿會

詔大臣舉賢自代副都御史梅公穀成通政使雷公鏞並以公名上時舉代者多不次用而公以母太夫人年高乞養歸購書萬卷自隨以雲南僻遠少書籍也平生慕湯文正公由監司解官家居從夏峯孫徵君講學蘇門十載卓然爲當代名臣思效其爲人故自奉天言事左遷需次京師八年暨終養又十三年仕途顯晦升沉家計盈絀不撓於心惟讀書不輟如儒生人之見之

者不知其爲京朝官也性直諒貌如其心與人交藹然
可親然有不可則義形於色雖顯貴人不少挫余自丙
寅冬督學中州別公於都門中間離索二十餘年南北
殊途出處異致迄丁亥始再晤京邸回憶舊遊落落如
晨星相與感歎歔歔愴然涕下然竊幸公碩果得與雖
蒼髯皓鬢猶時時賦詩飲酒彈棋論古不減壯年豪致
因得以听夕道故問難如曩時而不謂公之遽至於斯
也是可悲已按公先世居江西高安縣之菱湖曾祖時
鶚始遷滇之建水時鶚二子長大年歸原籍次大美公

祖也實始隸滇生五子公考琳與其季璉俱登鄉

已

更

覃恩祖考皆贈中憲大夫如公階祖妣吳妣李皆贈恭
人配淑人劉氏子二長峻增廣生次嶷太學生孫三人
公之歸省太夫人也取道西江拜高安祖祠偕族姓言
歡敘長幼講孝弟里黨觀者咸歎息稱盛事及歸攜其
支派世系纂修族譜旣成郵而合之公之敦篤本支又
如此所著有明儒四家纂斯文易簡錄讀漢書論等集
藏於家尤富於詩裒然成帙未梓也他懿行見於志狀

不悉書爲表其大者使歸而勒諸阡

兵部尙書總督浙閩覺羅滿公墓表

烏序是惟覺羅鳧山公靈魄之藏公

諱

滿保滿洲正黃

旗人系出天潢自高曾以上代著族常考少詹事

諱

僧

參貢時望公其季子也年二十二登康熙甲戌進士改
庶吉士丁丑授檢討戊寅春以詞臣副刑部尙書傅公
左都御史張公赴陝西清理糧冊蓋異數也遷侍講兩
典試事擢授國子監祭酒奉

命冊封朝鮮嗣王祭告禹陵陞內閣學士兼禮部侍郎
加

經筵講官時

聖祖仁皇帝御極五十餘年寰宇奠安愷澤翔洽獨東南瀕海之區久爲奸宄逋藪舊染宜新而民困甫甦凡所以調護扶植之者尤亟公以懿親侍從疊被

殊恩入襄機務

天子知公才可大用遂畀以福建巡撫之任下車浹日首勅閩帥之縱盜市功與夫劇盜之恃撫暴橫凌虐鄉里者遂悉擒羣盜殲其魁剿滅黨羽閭閻樂生農耕於野士興於學烝烝乎易俗移風矣迺請遴才能以居劇

北已屢傳作輶寧五載

天子益信公果可大用

特命總督浙閩兩省公職重身勞幾叢慮密不憚暑烈
躬按七郡之災全活億萬親度環海要地自浙江乍浦
至閩粵南澳之交上下五千餘里建墩臺水寨一百二
十七所安礮位一千一百七十有八海洋至今賴之所
至鴻施茂績若廣儲蓄均糧餉釐漕弊勘關征各有條
法大率兩省民生之厚兵防之周庶務之詳實自公籌
之始究也臺灣新隸版圖孤懸海外其處者寵且梗公

按圖考跡增北路淡水一營以扼其後時亂猶未萌也
辛丑五月奸民朱一貴倡亂戕殺鎮將焚府治全臺盡
陷警報一日夜至省會公聲色不動密召同城文武計
議以次日具海舟聲言運米下遊次日大閱兵老弱盡
令入城丁壯登舟刻期順流南下於是衆始知有臺變
公乃由陸路大張榜示凡有技勇超羣剽悍不羈之徒
咸許投軍門充伍雖舊日過惡悉與湔滌於是漳泉羣
不逞之徒思乘間竊發者咸歸幕府內地始安公親駐
廈門所檄召水陸之兵先期雲集米積如山以六月十

卽將出師密授機宜盡銳攻鹿耳門水高數尺揚
進十六日克安平鎮轉戰七鯤身皆大捷二十三
定府治賊惶駭奔竄北路而淡水一營阨險以待
軍夾擊賊進退狼狽束手受縛凶渠獻俘七日而
悉平公之方畧素定迅奏膚功如此捷聞

丁下詔褒美而公惟以不能消弭未然自引咎

宗憲皇帝紹登大寶錄功加兵部尙書

賜一品封贈仍畀以巖疆之寄公次第經理浙東西而
水利潮防運道離行及海塘柴石諸切務無不盡心焉

民不擾而事畢集至於今皆尸祝之惟公實被兩朝
之寵眷受任總制一方用能奉宣威德使反側畢安瘡
痍獲起利賴施及無窮歷四十年竟以勤事卒於官烏
虜公文武壯猷與方召比烈其不朽也夫有子十二人
博良阿那哈吉福吉祿滿吉蘇金山吉禧金樑衡山嵩
山承福吉善咸稟公遺訓吉善今爲祭酒樹學懋勲思
纂就前緒以新共事成均久且聞人知公熟也因請表
其墓道之碑系以銘曰

錫維城藩屏協劬厥躬東南攝勒鼎鐘光玉牒

傳

贈光祿大夫大學士柏巖長公家傳

故贈光祿大夫東閣大學士長公

諱

庚字柏巖其先江

西馮氏遷遼左順治元年

定鼎燕京公會祖父扈

蹕以入世爲內務府鑲黃旗漢軍人公生而穎異夔角

喜讀書習舉子業爲文詞樸摯多近裏之言試於鄉九

躋不渝中康熙丁酉科舉人出知縣事初蒞閩之武平

攝安溪調漳平被議事得白復調漳浦漳浦爲閩南劇

邑官斯土者往往以操蹙爲能公獨整躬率物易直子諒所以洽人心厲風俗者發乎至誠不假矜飾而誠之所動若草之受風油然自順不可得而名也先是春秋行釋奠禮牲牢之供取之屠肆而不與直其始出於奸胥之舞文已而遂沿爲故事公以爲卜牲麗牲凡所以明齋肅奈何索諸市而重爲民累耶立除其例時民間猶有以供給官府爲患者特揭示通衢自寸絲粒米以及菓疏魚肉悉依民價以償於是闔邑士大夫下至屠沽負販無不戴德立碑以識不忘縣南有得仙橋直閭

廣孔道圯於水行人病涉公捐俸以倡修復舊觀往來
利賴焉其他葺學宮修雉堞城樓興舉皆當民心聽斷
獄訟坦懷相示使民各得輸其情不爲鈎距之術民自
以不欺涖浦數年無水旱災祲癘疫及奸匪嘯聚格鬪
諸事俗以大和旣乃以母太夫人年且八十以情申大
吏得請於 朝奉太夫人終養 京師去縣之日民扶
老攜幼匍匐走送公遣之不能舍也乃夜間行以去初
公之在漳平也縣之永福里地環山中其民蠢愚或髮
蟠齒豁不知城市往往不以時輸公稅催科者數至則

又憖其長吏之煩苛醞釀至於悍不可以諭公抵其地
問父老曰若輸將輒不如令者何曰官以威脅我而吏
以賕迫我吾儕小人弗堪也公爲開陳大義言 國家
體卹周至民得詣庭自行投櫃若固樂輸何患迫脅爲
乃會計其賦額而約之曰毋怙爾頑疇能從爾剗倉廩
阜實室家其完皆大悅自是永福里爭先輸稅僉曰長
翁活我使我不陷於不義俗謂父翁民戴公德以公爲
我父也方是時公蒞縣才四十餘日耳會有疑獄公察
知其狀將平反爲期鞠兩造於城隍祠令觀者共聽之

因爲持其事者所嫉劾罷旣罷舍於曾氏縣民知公不受錢來餉公固却弗受旣而鄉晨門啟則米鹽蔬薪雜羅門外饋者竟絕去莫知爲誰久之而曾氏之門米未盈則市弗糴也薪未集則室弗炊也如是者有年迄今過曾氏者猶思慕不衰如周民之撫甘棠懷召公也凡公之爲治以誠得民類如此家居十餘年吾漳人之與計偕至都下者必造公之廬而請謁焉或手菓乾羹茗以餉曰鄉味也知公不嘗久矣公亦時具盤飧延共食酒數巡相與道故懇懇如家人狀公少與故吏部侍郎

留松齋公友善自公出宰十二年而歸松齋語人曰猶是當年馮柏巖也二公至七十餘歲懽洽如一日其與人交能久敬有晏子之風焉公以子今大學士英公廉貴贈如其官

贊曰爲人上者至能使民悅而信豈屑屑焉計劇易而論事功哉公爲政無赫赫之譽而所居民樂所去民思至於沒身不忘嗚呼此非可以僞爲而強民若是其故可思也傳曰明德之後世有達人非此其身在其子孫諒矣

彊恕林先生傳

先生諱瑩光字韜仲漳浦人。世居海雲之麓。平生友教
四方所成就不可勝數。晚構小築。顏曰彊恕草廬。於是
及門稱彊恕先生。康熙間新從父文勤公以翰林家居。
應大中丞陳清端公聘。主鰲峯書院講席。七閩之秀咸
萃。先生以諸生爲學使者薦。從公肄業。凡公所以講明
濂洛關閩之書。一時從遊士。或拘牽習俗。未能自拔。而
先生獨毅然以爲可行。公嘗曰。林生信道甚篤。其學其
行皆可師表。後進也因移書族人延主西湖家塾。洎公

白會城歸又延主下佈家塾時

新

諸兄弟稍長者皆從

學先生立條教甚勤講解經史示爲文義法自晝日至

夜分不休其後或館邑中從遊日益衆前後五十餘年

生徒半一邑凡吾家之秀出等夷與夫邑人士之卓然

有立者大抵皆先生弟子也乾隆庚辰

新

請養歸里再

延先生至家督諸子時先生年高不欲煩以訓詁而先

生顧不自逸

新

晨夕竊視回憶三十年前侍函丈臯比

談經掀髯奮臂商古今人物得失精神栩栩如昨日事

益歎先生完養爲不可及也先生爲人美鬚髯善談論

遇事情懷每公正發憤雖禍患不以撓其心待後學多
繩禮法與人交常面折然皆出至誠人無怨者性孝
與伯兄既分產歲常以所入脩脯分給之居父喪哀與
逾禮經營塋事必親登邱壠度穴小大雜傭伍負土成
墳母趙太孺人年既高孝愛益篤每假館歸必攜私錢
爲壽食他所遇糖飴菓品必懷以遺時或嬉戲母前母
笑曰汝欲效老萊子耶年六十時諸子爲週甲稱觴先
生雞鳴起自盥漱祝天爲母延壽畢卽就母床前作初
生小兒啼母曰汝辰時生日已高豈若是早耶因大笑

以爲樂其天真孺慕類如此至閑家有法首重男女之
防嘗言閨門中寧以嚴爲主凡人家所以致敗者皆少
長無別男女混雜所致故自中年以至耄老雖親生女
子暨子婦孫婦未嘗有親相授受者晚歲益喜爲文每
一篇出必集弟姪子孫使各出已見雜議之以觀其識
解故家雖貧而常有以自樂應鄉試十七科皆不遇而
志不少衰無拂鬱怨尤之態可謂冲養有道者矣卒時
年八十子元淞元淮俱先後爲諸生以孝友文學世其
家

蔡新曰呂榮公嘗言人生內無賢父兄外無賢師友而
能有成者鮮矣新幼承諸父訓長而受經所卒業者惟
二先生其一爲同邑樹滋陳先生其一則彊恕先生也
皆以真誠啟迪惠訓不倦新兄弟幸不隕先緒二先生
之力爲多今彊恕先生子孫盈庭皆能讀祖父書有聲
庠序異日顯揚褒大光昭先生之令聞宜也獨陳先生
長才博學爲文勤公所薦竟不用鬱鬱以終以兄之二
子爲嗣今僅有存者又皆貧困不能事詩書繼承其業
太史公有云倘所謂天道是耶非耶余因傳彊恕先生

而並及之以志不忘嗚呼爲可慨也夫

贈奉政大夫工部屯田司員外郎讓亭莊君傳

君諱

琛字堯甫號讓亭泉州惠安人其始遷祖曰敬齋

數傳至君考厚毅公

諱

際昭世有隱德不以名位顯厚

毅公三子長珍候選州同知次道基國學生君其季也

少警慧喜讀書聞泉漳二郡當

國朝定鼎十餘年間

海氛未靖至康熙甲寅遭耿逆之變鄭氏餘孽復乘間

竊發往來海上山寇內訌蹂躪殆遍士民失業傾家流

離播徙者不可勝數君兩兄旣事遠遊爲生計君亦自

以少壯不忍使兩兄獨勞從之遊後遂肩兩兄任業以

大振君至性過人篤倫理父歿事母益恭謹常乘海舟
客吳將抵上海颶風大作駭浪連天桅舵檣舵俱摧剝
船幾覆舟人惶怖無人色君叩天號泣曰死無所恨恨
不得終事母耳天而哀吾母也尙使某得生還以養俄
而風息人咸異之兩兄旣沒撫遺孤如已子家益裕好
行其德邑嘗苦旱大飢出廩粟以濟全活甚衆鄉里有
以緩急告貸者隨所給不責券貧無力者助之凡橋梁
道路有所興作關利濟人者必捐貲以倡邑人賴之自
奉儉約終其身無侈靡豪奢之習卒時年六十有一子

五人孫男十一人曾孫十有三人君歿十餘年以子維
禔職 贈君儒林郎候選州同知孫兵部職方司郎中
世英前爲工部屯田司員外郎時馳 贈君奉政大夫
如其官世芳乾隆庚午舉人自是遂爲宦族以文學科
第顯其家云

論曰聞當承平以後濱海輿區沃壤廣衍有力者坐收
膏腴連阡陌通魚鹽買舶之利不數年而致巨富者多
矣然皆擁厚貲侈第宅聲伎範圍以自封殖而贈君獨
以厚德聞君篤行君子也生不沾一命而受子孫褒封

遭時多故不克竟學而子孫擢高科遊庠序者接踵傳
曰非此其身在其子孫天之報施善人夫豈誣哉

從弟太學生遜冲家傳

弟諱長澍字遜冲宗伯文勤公四子也爲人方正剛果
簡曠而敏於事年五十以太學生終於家文勤公有子
七人五夭而殤長長漢雍正己酉舉人

特恩授刑部主事次長澐弟子員以優舉由知縣歷官
按察使擢兵部右侍郎三觀瀾辛酉

欽賜舉人官刑部郎授監察御史七長汭亦

欽賜舉人當是時

天子念甘盤舊學凡公諸子得以姓名自達必蒙

恩澤居官能稱職必加顯擢遜冲自幼侍文勤公京師
得聞當代名公卿緒論所見益廣爲文不拘繩墨娓娓
千言立就壯歲益自磨礪練習世故爲有用之學迨諸
兄以次授官遂棄舉子業獨身掌家政人謂遜冲子才
過諸兄出必膺顯仕遜冲笑而不答性友愛諸兄在官
家事無鉅細悉綜其任不分畛域歲時購致鄉味附賈
舶以進伯仲二兄相繼沒經理其家嫂姪安之所居梁
山之麓曰下佈自曾祖閣學公以來群從蕃衍數十家
凡賓祭婚喪疾苦遜冲必先至爲區畫曲盡其誠諸母

中有事難猝辦者必曰俟遜冲至至則立就籌策劃然以解或曰如此誠善顧費無所出奈何則笑曰吾已知之矣因出所袖金如所需之數與之子弟不率教不加面斥但仰視不出一言咸跼蹐不知所措鄉里惡少及諸豪奴悍僕驕蹇凌貧弱聞遜冲至慙懾就繩束自高祖以上族姓數百家居邑內外遇紛爭必詣遜冲爲平曲直酌準情理責以大義無不輸服迨遜冲世無有骨肉構釁自致終訟者其嚴毅公誠足以服人類如此遜冲旣以信義重鄉族諸當道咸敬禮之自邑侯郡守監

司皆折節願交大小事必加咨訪遜冲亦侃侃無避忌
凡吏疵民病事勢之當否人心之情僞胥役之積弊舞
文知無不言言無不盡諸當事亦多虛公採納見之施
行漳郡邑衙蠹蔑視紳士如土芥見遜冲則趨走承顏
色無敢不恭諸紳士咸倚以爲重家居稍暇則閱通鑑
諸史率子弟爲文會或課僮僕種稻秫菓蔬竹木雜以
花鳥間與野老話桑麻評物價稍事居積家以不匱晚
來頗厭外事當事延請多不至獨於家族事無所諉營
大小宗祠廟釐祭田清逋欠經紀士堡義學社倉凡諸

兄所欲爲而難其人子弟所畏避而無肯當其任者皆
獨身爲之勞悴嫌怨有所不恤非所謂急病讓夷不賢
而能若是歟卒之日家之父兄子弟鄉耆老咸走哭失
聲郡邑士庶聞之莫不齎咨涕洟謂斯人不宜遽至於
斯也嗚呼惜哉向使遜冲踵諸兄後受爵祿榮及其身
雖克稱厥職而人之所以倚賴而痛傷之者必不能若
斯之劇也人生自立顧在勢位乎哉娶張氏先一年卒
子三日邁曰慙曰詠皆習儒業遜冲之卒也其三兄侍
御季澄以病家居哭之慟以書來曰四弟之爲人兄所

知也不幸至此其孤幼不能具事狀以丐銘誄瀾又病
廢悲哀執筆輒嗚咽不能下願兄之有以傳之也余悲
季澄之失左右手又悼遜冲之不竟其用也因著其生
平梗概書以歸之爲家傳

連氏四節婦傳

龍溪鎬山連氏一門五世得節婦四人其最先守節者
曰陳氏連曰融妻也年十八于歸二十有七而寡家故
清貧姑老子學殷學諱俱幼陳矢志紡績以供衣食時
海氛未靖山寇竊發郡邑居民流離遷播者千百家陳
辛苦漂泊轉徙靡定時竄伏草谷間日不食以爲常卒
以無事養姑克盡婦道撫二子各長成族黨咸歎異之
苦節三十九載卒壽六十有七孫國柄學諱出也學諱
夫婦早喪國柄幼育於學殷及長娶周氏有婦德旣入

門以不逮事翁姑爲恨念夫幼時賴伯父母以克成立
事學殷夫婦如舅姑禮厯久不衰生一子宗英甫八歲
而國柄歿周時年二十有八搢搢內外脫簪珥衣飾營
書室延師教子蓋婦人而有丈夫志行詩所謂女士者
也年未五十以清苦終初學殷之子國樑夫婦亦早喪
遺孤宗宰未及成立周旣以舅姑事學殷夫婦卽以子
撫宗宰孤苦相依三世無間人以爲難厥後宗宰娶王
氏三年而宰歿子家琬娶唐氏而琬又經商客死海外
故王氏唐氏婦姑相繼皆以節顯王之稱永亡人也年

甫二十遺腹僅七月宗祀不絕如綫王曰泣禱靈前曰
天未絕吾夫血食幸而有身男也終將撫之若女也
從夫地下旣而家琬生王辛勤愛護撫養日則偕叔母
周共奉八旬祖姑夜勤十指積女紅爲家琬娶婦旣得
孫矣乃命琬往南洋爲生計未數年而訃至唐慟哭幾
絕誓不欲生王泣謂曰汝翁歿時若夫尙在吾腹吾寧
忍死以至於今爲連氏一脉也因抱孫啟聰泣曰若從
夫地下是孤也將何恃而屬諸余余羸老也氣力竭矣
堪再世任此乎汝賢當益憫我唐聞言卽翻然撫孤盡

孝養時年二十八婦姑相守又三十年今王年八十餘
皓首康寧唐年五十餘已得抱孫乾隆癸未龍溪重脩
邑誌連氏以四節婦年例俱合 旌格呈請入志因得

附名云

論曰余閱郡志勝國時詔安有郭將軍者一門四節事
與連氏大畧相同邑學博盧君洪聲作歌傳其盛及考
列女志僅紀其三其一無名氏又所載多闕失與盧歌
殊無可核實嗚呼婦節之難也聖王重之以厲風教立
禮義之大閑於是乎有棹楔之旌而委巷蓬蓽之婦

貞百折不能自達者多矣余未及考郭將軍行蹟然要
皆庸勲世職而其家門之節烈可以增輝女史者猶闕
畧無稽若是余故於連氏四節婦有感也

水經

水經

水經

文

祭副都御史翠庭雷公文

嗚呼閩學云遙孰承道脉幾晦而彰榕村學的誰其嗣
之我先宗伯鰲峯講學多士駢肩公厠其間沿流討源
先河後海滙以百川初上公車名行夙著名儒鉅公交
口薦譽太學分司德音孔懿經師人師聲聞

當宁出入 承明勸講 東序懇懇其忱引德導義旣

丁外艱哀呼孺慕南北間關屢回

宸顧服闋歸朝

天顏是悅爰擢銀臺筦司喉舌旋躋憲副臺綱用挈繫
惟斯時

帝眷方屬南望縈心白雲在目

帝鑒公誠作人是寄玉尺持衡永錫爾類大江南北浙
水西東板輿迎養密邇鄰封出則談經入則盡孝匪言
是資惟身是教甫屆瓜期陳情

上告

帝命不違歸承色笑脫我繡衣加我綵服歡侍北堂謂
膺多福胡不少延梧棖痛速苦塊逾年禮無時哭宅兆

既安從幽不復嗚呼我公言坊行表企仰遺徽追蹤蓋
少公之學脉洛閩是程鵞湖鹿洞擇焉而精公之文章
晶瑩純粹匪孟匪樊南豐是嗣新等通門義貫丹青憶
公弱冠露爽英英來遊金浦徒步漳汀西湖月霽梁麓
風清經綸道義瀾我心靈迄公入仕崇階載陟我步後
塵以引以翼 禁苑分輝無間昕夕靡事不咨無疑不
析及公旋歸我亦侍養兩地倅交問母無恙客歲書來
惄然心悸斬焉衰經又殤幼稚日者有言大命亦促小
道何憑不疑奚卜如何初冬忽驚集鵬聞訃悲傷淚痕

滲漉匪我私公儒林氣縮嗚呼天道靡常彼蒼曷極逝
者如斯人罔不盡灑淚陳詞公平來格

哭從弟亦飛文

維乾隆十三年某月某日庶常三弟印湖旋觀將以某
日南歸仲兄新在河南遣五弟元寬入都護送且使以
菓品庶羞哭而告之曰嗚呼吾至今而始能爲文以哭
吾弟也人誰不死孰若吾弟問彼蒼而莫得其故也人
誰不傷兄弟之死孰若余於吾弟非尋常手足之誼所
得同其悲慕也弟幼而岐嶷長多奇氣方及成童力學
可畏英華自儲根深實遂追風木之旣悲當鵠原之多
難蓋磨礧浸潤者又數年而性情學問已漸幾於純粹

自是以來利達不以易其心貧窮不以奪其志待族黨
以恩處鄉鄰以義誨子弟以誠和戚友以誼嫉惡如仇
而口不言人非樂善如渴而稱揚之不置凡茲嫩行之
在人夫固更僕而難數也余在諸兄之中知弟最深弟
亦待余獨至憶丁未之秋同居清泉之寺或併日而食
或終夜不寐惟聯吟並倡之是樂曾何知貧賤憂戚之
爲累泊乎余官京師弟亦領解南省自計偕往來以至
同讀中秘蓋未嘗有數歲之隔而所相期相勗者弟告
我以家學之難承余亦示弟以世道之不易嗚呼以余

之拙疎寡合思得同志之士相與砥俗維風而常不可
得弟獨有心以共濟也以弟之嚴毅誠慤卓然思自樹
立者而夭折以終余復何所冀也自余再至京師之明
年哭刑曹先兄於京邸今又哭吾弟焉皆三十九歲而
相繼以逝七年之間死喪再見豈天不造吾家故降災
之酷如是耶亦豈先澤之未可恃培之於成童者而常
失之於壯歲耶術者謂我祖廟之前地短縮主達者不
壽余不敢信其然豈吾弟竟遭其戾也余以王事馳
驅斂不得憑棺歸不與執紼此情何能寘也今使五弟

護喪南歸亦庶幾無虞於途次也弟之子聰慧力學尙其克成爾志教養之事余當不敢膜視也嗚呼哀哉尙

饗

哭軒女文

嗚呼汝何爲而生耶汝逍遙於太虛之中與造物者遊
無端而予汝以知覺運動之性子汝以耳目口鼻四肢
之形予汝以父母兄弟姊妹長幼之序又以其無疚無
罪之身予汝以疾病伸吟醫藥針灸之苦而卒無救以
死嗚呼吾累汝也夫雖然汝又何爲而死自汝初生吾
卽已竊祿於朝不汝饑不汝寒汝性又醇父母汝知孝
之兄姊汝讓之弟妹汝愛之人以是盡稱汝而余亦最
鍾愛於汝將撫汝教汝以至成立乃吾按試河北未閱

月而汝一病而殤使余聞信悲哀不能自禁嗚呼汝負
余也夫吾累汝自無而有汝負余自有而無嗚呼余之
不悟也久矣始於無終於無其間有者正佛氏所云夢
幻泡影耳而榮枯欣戚貪戀惱觸輻輳葛藟漚漚至於老死
而不悔者何比比也吾哭汝而有省焉是又天之借汝
以警覺余也夫吾今不復爲汝悲將坎地而葬汝焉汝
生於京師沒於中土豈復知鄉土之可戀耶汝生前食
果善讓粗讀書卽能識字吾今遣僕以果品祭汝爲文
哭汝汝其知之耶嗚呼哀哉

行述

誥封太夫人 旌表節孝顯妣林太夫人行述

嗚呼天竟奪吾母耶 不孝等生數歲而孤恃吾母以長

以教以至於今日而今復何恃耶承懽路絕抱痛終天

顧念吾母平生苦節完貞辛勤育子仁孝恭儉寬和之

德足以庇子孫而感蒼昊者將邀 當代立言君子以

闡發幽光垂休志乘爰是忍死含哀畧陳其概母姓林

氏爲浦望族處士 諱元猷公女年十九歸先君贈侍郎

公爲先王父贈資政公冢婦先王父雖生長宦族而家

值中落貧窶特甚性恬淡友教四方不問家人產仲父
叔父年尙少先君爲家督搢撐內外先王母李太夫人
素善病氣體羸弱母旣至竭力承事躬勤操作自饋食
酒漿棗絮米鹽暨諸叔補綻衣袂事悉肩其任一不以
累姑先王母喜曰自吾婦入門吾無事矣先君性至孝
平生最惡夫娶婦入門而私其財物者當母于歸時先
王父多借券未踰月先君謂母曰豈可以是貽吾父母
憂累母聞卽脫簪珥首飾持歸向外王父求轉售外王
父訝曰何遽耶則詭曰有舊所質田求贖者鬻此歲可

多得數石穀以佐饗殮外王父領之然悉以償宿負實
未嘗贖質也先君攻苦力學屢屈小試居常鬱鬱竟邁
危疾咯血近三年母晝夜侍唯謹調和藥物具甘旨病
中或多恚怒母和婉承順務得歡心先王母亦頻年病
肺強半在床憂先君之多疾疚也先君亦慮王母之衰
頽輾轉增劇母周旋其間委曲調護多方掩抑兩釋其
懷于歸時故有使婢自先君病卽鬻以供醫藥食用之
資自是藥爐茶鐺膳飲之具炊爨井臼澣滌箕帚之勞
纖悉必親辛勤備至自古稱事夫之順養姑之誠未有

若吾母之艱者也巳丑六月先君見背其冬先王母繼
逝半載之中兩遭大故歲又洊饑瓶無儲粟先王父素
懷曠達不以家累紛心至是亦悲不自勝母哀毀創痛
忍死襄事蓋上以慰王父之心而下念不孝兩孤煢煢
在疚與撫養成立以竟先君之志也嗚呼此豈不孝所
忍言哉方先君之沒也不孝年僅六齡未省人事不

孝新

則纔週歲耳疾病尪羸母當愁苦顛困之餘乳水

盡絕惟日飼粉餌每夜啼則抱以步庭中懼王母聞之

不安寢也如是者又半載古稱遭家不造育子之閔又

未有若吾母之甚者也迨不孝等年稍長從父文勤公

延師家塾課子弟不孝兄弟稟學焉衣食之計惟母是

資日勤刀尺針黹門外多隙地傭誅鋤以種蔬菜不孝

等每日自學堂歸母提甕出汲令兄弟並舉以灌蔬母

親自巡視澆溉夜則共環一燈母偕吾姊紡績其旁不

孝兄弟循誦日課聞書聲朗朗則欣然稍昏倦輒舉先

君力學費志引古人斷機教子以自況日食不過溢米

爲糜粥或雜以薯芋或時不舉火蓋數十年未嘗有糲

飯之一飽而十指勤劬摒擋家計亦未嘗一日稍閒以

故不孝等自娶婦以前尺布隻履未嘗取諸市一衣一

襪未嘗問諸縫人皆母所經營手製也是後遣嫁吾姊

及不孝兄弟婚娶事雖竹筍練裙銖兩尺寸亦惟母多

方節嗇拮据萬端以成之者嗚呼母之心力亦盡瘁矣

先王父年既高不任館事家居就叔養母必時其饑飽

和膳飲以進王父甘之嘗謂之曰自汝爲吾家婦未嘗

得一日開顏而汝無怨恨益孝謹吾雖不能助汝天必

佑汝子汝孫使成立以報汝也王父之喪仲叔兩父以

不孝

等年雖長成尙未克家喪費欲不與母曰如是則

吾心不安吾寧減食以襄親喪亦使兒輩知所盡心焉
耳自殯殮以至葬埋費無弗均者自是以後食口漸增
艱窘益甚母獨力支拄惟冀不孝等讀書成名不使謀
衣食以荒學業迨不孝兄弟先後入泮又先後舉於鄉
又先後成進士官翰林母始獲怡顏然食貧猶如故也
泮泮箴紉之事未嘗稍息綜核家政筭理內外未嘗或
懈子婦等或勸以稍節勞勩則曰居貧作苦吾能安之
況食指日繁兒輩清俸未能顧家汝等遽圖安逸耶諸
婦咸惴惴不敢出一語

今上初元恭遇

覃恩母受封太孺人其明年邑紳士以母苦節事實

列呈當道得請於朝奉

旨旌表給銀建坊舊例命婦不得請旌今

天子錫類推恩特准大臣奏凡以節受子封者仍予旌

表著爲例母適逢曠典遂荷新恩亦其艱貞百折

之誠不能磨滅若有天人之佑焉乾隆十六年

慈寧大慶

恩覃中外母晉封太夫人又十年國慶稠疊盛

封太夫人時長孫走已領庚午鄉薦授

丙閣中書舍人諸孫本倣本仗亦於丙子庚辰先後舉

於鄉本侃本佐並補弟子員二十餘年間

綸褒三錫翟弗洊加又親見子孫登科第列膠庠者若

如人人以爲榮母感激

洪恩回思往事悲喜并集涕泗交頤惟囑不孝等力圖

報稱重惜身名毋負

主以辱親言之嗚咽不孝淮當乙丑選授庶常之時新

初承

恩命入直 上書房侍 皇子講讀兄弟京邸聚首遺

母家居夢寐不寧共謀迎養母以北地苦寒水土不習

堅不肯往時 新既列職 禁近義不敢顧私家 淮初登

仕籍未授館職進退尚可隨宜乃不待散館踰年告歸

丙寅冬 新奉

命視學中州又念官舍清閒廉俸所入足供甘旨再敦

請迎母就養母留戀子舍不任跋涉又不果行於是 淮

始絕意仕進留侍膝下至今垂二十年未嘗稍離左右

國恩深厚口體之養漸可不缺於供而母茹淡被素之

屋不改於舊偶有肥鮮僅嘗匕箸裁成綺縠惟載饌司
屈指生平未嘗有世俗一日之享用也乾隆十八年
以刑部侍郎請急省覲 陛辭之日

御賜母內府緞疋貂皮旣還 朝又蒙

天語諄諄垂問備至惟草野疎賤豢養 內廷驟躋九

列每當清晏賜見之下 詢及家世因得以孀母艱劬

之狀瑣塵

天聽曲荷矜憐不世遭逢罕有倫比丁丑五月陳情丐
請終養幸蒙

天鑒俯允 朝例父母年未八十非獨子不得請終養
時淮奉母家居母年七十有六尙格成例獲遂烏私豈
新區區微悃所能仰邀 異數皆由

聖主教孝之深仁亦吾母精誠所感召也庚辰辛巳

新

兩赴 闕廷恭祝

慶典蒙

御書賜母歐荻延禧匾額又

特命內侍頒賜上用緞疋蓋吾母一生苦節久在

聖慈洞鑒之中故

天藻之褒嘉

恩施之優渥如此其至惟

新

兄弟弗類不但學行文意

不敢媿歐公之萬一有孤荻教深恩而鸞叢孽深不能

仰承

聖主錫福延禧之仁再引母年於有永此則

不孝

之罪

上通於天者也母素未嘗讀書而深明大義言動皆合

於古人先王父晚年司訓安溪時

不孝新

隨侍偕行母

戒之曰汝不及事汝父汝父不能終事汝祖今汝事祖
能代父之職卽汝父事祖也卽汝事汝父也汝其念之

又曰官舍無事侍祖之下惟有讀書切不可私出溫交
匪人又曰聞教官冷署寒氈兩僮僕皆吾鄉人凡事當
從寬恕不可輕加怒詈其他不可殫述大要皆孝謹仁
厚之道性好施偶有私蓄戚姬鄰媪必均之罄所有而
後快處妯娌以和以讓至今諸叔母存者皆白首相對
欷歔言舊日事不忍舍去尤善曲體人情雖婢僕不傷
其意誨諸子婦曰婦人最壞在丈夫之前稱說是非男
子不聽婦人言者絕少但十信其一二而家道乖矣汝
等戒之愛不孝等雖顧復不舍每以四方之志爲勗不

孝等自應童子試以至歷官京師近者數月遠或數年或十數年每臨別拜辭母喜見顏色絕無兒女子離別態新之假歸也

聖恩不卽開缺不敢久稽以母年邁遲迴未忍卽發母日趣行程曰毋以吾故久曠職守我筋力尙健可無慮也又曰汝爵祿已逾涯分吾非欲汝干進不休顧

主恩難報耳行也勉竭心力幸無顛隕雖在萬里猶吾膝下也嗚呼此豈巾幗之見哉素康強少疾病晚頻得目疾七八年來醫治寡效遂致失明今年正月長曾孫

行照

自京來就婚既完娶親朋畢賀咸登堂爲母稱慶

方謂期頤可期得享五代相見之福詎意三月飲食頓

減精神漸困

不孝

等多方調治六月少差立秋以後轉

劇然猶起坐如常八月朔日晨興令人扶掖具禮服焚

香叩天地十九日第七孫

本任

娶婦入門尙能強起受

孫婦拜自是寢疾二十餘日而終嗚呼痛哉綜吾母一

生五十年前艱勞萬狀無非爲

不孝

兄弟也今日俱通

朝籍俱荷

國恩得率子舍孫曾共嘗湯藥親視殮含

亦母之劬躬燾後有以致之獨恨

不孝

等侍奉無狀誠

不足以邀休福養不足以答劬勞子職既虧

君恩亦負雖自怨艾其何追耶天平母乎此痛曷有極
耶母生於康熙二十一年十二月二十日未時距今乾隆
二十九年九月十四日午時享壽八十有三子男二
人女一人孫男十一人女五人曾孫男女二十一人嗚
呼慈顏永訣風樹增悲草土餘生荒迷晉亂謹就記憶
所及詮次未能十一伏惟大人先生矜其生前而不棄
其孤錫之銘誄志傳用垂永久

不孝

等世世子孫感且

不朽

翰林院庶吉士伯兄青巖先生行狀

先生姓蔡氏

諱

澹字視侯別號青巖世爲漳浦人蔡氏

於浦爲宦族用清白世其家至先大夫貧特甚生二子

先生居長次

新

先大夫沒時先生甫六歲

新

尙在襁褓

未省人事太夫人忍饑鞠育稍長偕先生就塾貧不能

得師從父文勤公延師以教先生甫就學卽知發憤舉

動如成人不妄言笑每日夕自館歸隨太夫人抱甕灌

畦蔬時與

新

昇所汲水

新

力弱多傾跌先生伸縮其擔

俾獨肩重任而輕其前以授

新

逢假館則厯園圃種薯

讀收荳莢冬行林麓掃隕瘁枯枝以爲薪蓋讀書之外
劬勞作苦者又如此旣弱冠始授徒爲蒙館師歲得微
束以佐饗殮太夫人愀然曰是子能任人館事稍資家
計吾亦喜之但恐學業未成滋荒落也先生聞言益刻
苦自奮雍正丙午先大父資政公司訓安溪得末疾先
生自家奔侍時新偕仲叔兩父省試未回先生獨力侍
奉勤抑搔調藥餌和旨甘以進晝夜不息是秋同扶侍
歸里踰月資政公卒先生爲適孫承重三年無違禮旣
服闋補邑庠生丙辰 恩科從弟雲從領解南榜先生

同登薦薦是冬與計偕明年春應禮部試薦而不售時

新

已授職編修晨夕在京相聚先生告

新

曰我先君之

棄諸孤也二十九年矣而未安窀穸汝既受

主恩得榮邱隴當速圖之吾不遇將先歸以遲汝

新泣

留至秋請急因偕行取道潞河以歸既抵家太夫人色

喜卽命經營葬事先生素不習形家言又惡夫世之惑

房分兄弟相爭執者凡相度登陟之事一以委

新

既得

吉

新

亦請命先生周歷相視時出一二語以定平生活

退自安淡於取名聲氣烜赫之場必謹避之王戊會試

中乙榜需次教諭先生喜曰吾少無宦情廣文一席與
諸生講學論文猶吾志也苜蓿寒氈吾能安之甲子長
子超中副榜是冬欲爲娶婦不赴禮闈時新典試西江
移書趣之乃行乙丑登進士

殿試二甲改授翰林院庶吉士時新

入直

尙書房兄

弟再聚京邸念太夫人春秋高謀請迎養太夫人憚於

跋涉不果行先生乃謂新

曰汝受

恩深重義不敢顧私家吾初登仕籍未受館職進退尙

可隨宜不俟散館踰年竟歸自是以來侍奉太夫人

居十有八年不離左右自室廬居處飲饌服食田產租
賦以及延師課諸子賓朋相酬酢悉肩其任凡使新十
數年得以竭力

王事無將母內顧之憂者先生力也丁丑新蒙

恩予養歸里見先生鬢髮鬢髻惻然動念先生笑曰吾
年逾五十領下鬚白過半然筋力尙健雖年少無以加
始末之信迨後侍先生久實不見有衰老態也辛巳以
長子超任中書舍人

覃恩封先生階文林郎秩如故次本侃本佐

皆補弟子

具長孫

行照

娶婦踰年得女孫一門之內五代相見人

以爲難甲申九月丁太夫人艱哀毀踰節氣力始就衰

然步履猶如故也乙酉秋營太夫人宅兆先生扶柩冒

雨徒步行山隴往返七十餘里衣盡濕夜宿山麓連夕

寐既襄事

新

困頓不支先生神氣自若薦事無情容

容釋服以後偕親友言歡族戚道故未嘗稍倦易簣

與弟兄叙飲言笑如平時申刻忽中風痰之

至床口緊閉氣逆痰壅藥不能達延至寅刻而

呻吟痛哉性寬厚氣度安詳與人交渾然不見涯涘

雖子弟有過未嘗面折

新

素褊急每與人辯論有不合

則面赤聲高氣勃勃勁雖在先生前亦時不自檢顧先

生氣益和聲益緩

新

過後輒自悔恨愧服益嘆先生充

養爲不可及也家居數十載不入城市足不履公庭當

道咸敬重之家族有爭辯來見悉勸解之子弟能文者

時爲課其高下工書法求索無虛日晚益自省事學靜

攝凡鄉族間糾紛相質正無大小悉命

新

主之惟閉關

却掃坐一榻焚香煮茗時或臨池以自娛樂嗚呼觀先

生之性量與先生之所以自處咸謂期頤可期不意其

遽至於斯也豈非命也歟先生生於康熙甲申八月二十五日卒於乾隆丁亥正月十八日享年六十有四配商氏 勅封孺人子六人女二人孫男女十五人曾孫二人先生之歿也長子超供職 京師聞訃尙稽時日

本侃本佐

泣請曰大人懿行不孝孤等昏迷瞽亂不能

省憶知大人者惟叔父願有述嗚呼新與先生六十餘

年兄弟幼同居同就塾習勞苦長同仕宦雖中間南

北睽違然往來聚首京邸相晨夕凡數載晚同侍慈闈

襄大事又十年及今視殮含焉嗚呼已矣迴憶生平如

夢如幻竊念知先生者誠莫如新諸子弗若也因和淚

濡墨畧書梗概詞不能文事多掛漏冀立言君子錫

之銘誄志傳以備史氏之採擇焉乾隆三十二年正月

勞服弟新泣狀

卷之三

卷一

上

詔封一品夫人亡室何夫人行畧

嗚呼夫人歸余五十二年始終無間余少則奔走衣食壯復馳驅四方中間聚散無常忻戚非一自戊子秋夫人再至都門於今十有三年年皆七十有餘方冀皓首相莊共邀遐祉不意竟棄余而逝也婦人行不出閨梱宜無事於狀顧念夫人相余自食貧以至通顯其代余供子職庀家事鞠育子女黽勉有無有使余哀思不置者是不可以無言也夫人姓何氏同邑太學生諱鳴玉號藍仲公長女幼而端靜父母俱鍾愛之年十五擇配

未字雍正甲辰余年十八初入泮藍仲公見而屬意歸
與夫人母許孺人謀之時求婚者衆余少孤家最貧孺
人未有以決也乃夫婦齋戒焚香禱天卜之獨余得吉
遂定婚焉余貧未能娶授徒於外越五年己酉始于歸
甫旬日余卽赴館夫人偕嫂氏親入厨下操作事姑惟
謹太夫人喜曰新婦能安貧吾無憂矣其明年余館從
父家然食指漸多修脯不繼夫人每讓粥以食姑家居
近林麓一婢可十餘歲日拾枯枝掃落葉以佐薪夫人
躬執炊爨殊自安也辛亥長女生壬子余領鄉薦其冬

長男

本做

生癸丑余下第歸仍館從父家其時食指益

繁困益甚余時或抑鬱無聊憂形於色夫人必多方

譬口不言貧談笑自若一日侍太夫人食畢以薄粥偕

嫂氏對食缶中米粒粒可數嫂氏喟曰如此俾腸胃益

寬奈何盍減水煮糜少食可也夫人曰我等皆哺兒者

薄粥多液冀化乳也乃相視而笑又一日午煙將斷嫂

顧夫人曰瓶罄矣曷往東家告貸乎夫人卽偕婢子携

布囊過田隴循麓至從母黃孺人家孺人令婢携斗米

先歸留夫人坐夫人曰家待此以舉火孺人曰家有米

矣遂留之食薄暮始歸嫂午殮已畢戲謂夫人曰此人
全無心肝又相視而笑嗚呼此皆鄙瑣不足爲外人道
者然一時艱困之況與善自排遣之情余歷歷憶之不
能忘也乙卯本使生丙辰余登第選庶常伯兄青巖先
生亦以是秋領鄉薦皆在京師雖一家交相慶慰然無
解於貧窶夫人苦身力作如故丁巳余散館授職卽請
急歸爲先大夫營窀穸旣蒞事余請太夫人就養京師
太夫人堅不肯行夫人亦請留侍太夫人謂曰汝當往
分携子女入京可省老人累也夫人不得已乃行旣至

京宦橐蕭然凡子女衣襪皆手自縫紉有時裹頭偕媼
婢往來厨竈間檢點煤米作苦與在家無異時余以家
累重未能多割俸以贍菽水遲迴却寄夫人愀然曰憶
丙辰冬君在翰林兄公亦公車北上時當歲暮無數錢
之蓄姑媳相對歎息忽於除夕前一日君寄白金四兩
至太夫人喜動顏色遂得從容度歲是君四金之奉勝
三牲之養也必俟有餘將何時矣余感其言自是每歲
恒節嗇以寄甲子余典試江西歸甫入門夫人遽問曰
江西距家不遠太夫人有使來否余曰使來告急余以

官給路費一百二十金往矣夫人乃大喜其每事不忘
姑如此明年春余入侍 上書房常在直廬夫人摒擋
家計纖悉備至丙寅九月兒 本在 生猶自乳也十二月
余奉

命視學河南夫人偕子女之任時從弟庶常雲從服闋
携眷入都姪 本朴 甫十歲貧不能延師屬余携赴學署

夫人撫之如已出官舍無事日教女奴紡績率先爲倡

曰以此習勞且代匱也戊辰 本份 生始覓乳媪庚午余

將報滿夫人知余有陳請之意先告歸余罄數年所積

廉俸俾歸奉太夫人且俾伯兄主之夫人悉遵余言無

難色辛未二月兒

本俊

生余自入京由侍講五遷至刑

部侍郎癸酉乞假歸省入門家慶太夫人喜形於色且

言汝婦善事我逾於曩昔貧賤時也時以

恩旨不開缺不敢久留甲戌回京供職丙子

本俊

登鄉

薦丁丑余蒙

聖恩予養歸里初夫人雖左右奉養而家事皆稟命於

太夫人至是太夫人年益高夫人乃代理家務時余久

宦新歸親族問視釋綬不絕家用愈繁食指三千計夫

人董率婢僕酒漿饋食無愆禮者稍暇則侍藥餌時食
飲於太夫人側庚辰

本叙

領鄉薦甲申太夫人大故三

年之內艱熒萬狀余孤露餘生罔知所措外事惟諸昆
弟共襄內事則夫人是問亦不知其何以能免罪悔也
嗚呼痛哉丙戌服闋丁亥春將入都臨行告夫人曰今
先人之事已畢又五男皆婚三女已嫁吾夫婦年皆六
旬內外豈堪白髮再參商耶夫人諾之戊子偕二子婦
來京師數年之間屢逢

國慶頻仍

覃恩晉封夫人累封一品夫人辛卯冬恭遇

皇太后八旬萬壽夫人偕諸命婦虔設經壇迎

安輿於西直門內蒙

皇太后恩賞雲龍補緞如意手爐荷包包頭巾帕脂粉
梳篦等物又以年過六十加

賞大緞二疋夫人自念海濱臣妾遭遇非常得從翟弗
魚軒之後被象服跪迎道左仰瞻

聖母慈顏

左

錫予便蕃誠千載一時其歡欣感激之誠每稱述不置

云顧余受

恩深重久直

禁廷寅入申歸京邸一切日用家事仍

夫人主之一不以關余心故余得以盡心供職幸免叢
戾今一旦棄余而逝余如失左右手也夫人幼讀書僅
識字然能明大義重倫理尤篤於事先凡余所欲置烝
業祀田皆竭力贊成之先祖贈公所居室久壞諸昆弟
欲重新以爲祠而費近千金慮無以辦夫人將入都娣
姒咸以爲言夫人慨然許獨任至則爲余言之余曰吾
志也如力不逮何夫人曰君但漸次爲之分年遞辦事

必濟余從之今已堂構一新凡戚族至京師者必留之
寓室滿而止平居不持齋不誦經咒不信僧道而敬禮
神佛甚恭性和平樂易不與人爲忤人亦無忤之者子
婦入門必述太夫人辛勤苦節及早年艱窶狀以爲勗
不聽婢媼之言女黨中有遣婢至者致使命外卽令速
歸嘗言婢媼不可與深言不可問以私事恐由此啟嫌
也其他謹小慎微往往類是素無疾病去年五月得風
痺症行動需人今年八月後轉劇十一月十三日爲夫
人生辰子婦等扶坐堂室受拜旋就寢越七日而逝嗚

呼哀哉憶二十年前夫人晨起告余曰疇昔之夜余夢見先父因問以兒壽幾何父曰汝年七十一夢境歷歷可識時夫人年未五十固不知七十之遽也亦豈知其夢之有徵果若此耶夫人生於康熙四十九年十一月十三日卯時卒於乾隆四十五年十一月十九日辰時享年七十有一子男五人女三人皆夫人出孫男女十人曾孫男女五人俱幼嗚呼風帷雲蓋觸緒增悲昔人伉儷之傷恒見悼亡之什余羸老也寧堪此乎因粗述梗槩以寫余哀思非敢質諸大人先生亦庶以昭

示子孫云爾

系三ノ一



